

Controllas pli flexiblas en il Puschlav

Il cussegl federal ha respundì a Martin Candinas

■ **(anr/vi) Suentar la notg d'enguladitschs en il Puschlav è la guardia da cunfins actualmain londervi da procurar per controllas pli flexiblas e moviblas. Quai ha respundì il cussegl federal a Martin Candinas (pcd/GR).** Il cusseglier naziunal è s'infurmà il glindesdi durant l'ura da dumondas sch'i saja pussaivel d'introducìr controllas sistematicas durant 24 uras al di als cunfins a Campo-Cogno en il Puschlav (LQ dad ier).

Il corps da la guardia da cunfins sa stentia da porscher cun ils meds disponibels ina surveglianza da cunfin effizienta, scriva il cussegl federal en sia risposta. En col-lavuraziun cun la polizia chantunala vegnian adina fatgas controllas flexiblas tenor basegn. La guardia da cunfins a Cuira saja ussa londervi a procurar per pussaivladads pli flexiblas e pli moviblas.

La guardia da cunfins saja mintga di 24 uras en servetsch. Cun las resursas actualas na saja quai dentant betg pussaivel d'introducìr di e notg controllas da personas sistematicas al cunfin. Il contract da Schengen na lubiss gnanca quai. Talas controllas sistematicas na sajan er avant Schengen betg stadas pussaivlas. Cuntrari ad auters pajais haja la Svizra dentant anc adina la pussaivladad da far controllas da duana e da rauba als cunfins.

Er en autras regions da la Svizra dettia quai dapli ladernitschs durant questa stagion. Perquai infurmeschia la polizia en differentas regions ils burgais tge mesiras ch'èn d'interpretar per sa proteger. La notg dals 17 sin ils 18 da november èsi vegnì rut en a Poschiavo tranter auter en la chasa da scola. Igl è vegnì engulà ventg laptops e daners.